

MICHEL DE MONTAIGNE

ESSAYS

Book 2 · Chapter 26

Original text in Middle French (1595, Public domain) · Last updated on February 14, 2022

HYPERESSAYS is a project to create a modern and accessible online edition of the *Essays* of Michel de Montaigne. More information at www.hyperessays.net

GOURNAY-2-26-20250113-154249



Des pouces

^a TACITUS recite que parmy certains Roys barbares, pour faire une obligation asseuree, leur maniere estoit, de joindre estroictement leurs mains droites l'une à l'autre, & s'entrelasser les pouces : & quand à force de les presser le sang en estoit monté au bout, ils les blessoient de quelque legere pointe, & puis se les entresuçoient. ^a Les medecins disent, que les pouces sont les maistres doigts de la main, & que leur etymologie Latine vient de *pollere*. Les Grecs l'appellent *ἀντιχειρ*, comme qui diroit une autre main. Et il semble que par fois les Latins les prennent aussi en ce sens, de main entiere :

*^a Sed nec uocibus excitata blandis,
Molli pollice nec rogata surgit.*

^a C'estoit à Rome une signification de faveur, de comprimer & baisser les pouces :

^a Fautor utroque tuum laudabit pollice ludum :

^a & de desfavor de les hausser & contourner au dehors :

*^a conuerso pollice uulgi
Quemlibet occidunt populariter.*

^a Les Romains dispensoient de la guerre, ceux qui estoient blessez au pouce, comme s'ils n'avoient plus la prise des armes assez ferme. Auguste confisqua les biens à un chevalier Romain, qui avoit par malice couppé les pouces à deux siens jeunes enfans, pour les excuser d'aller aux armees : & avant luy, le Senat du temps de la guerre Italique, avoit condamné Caius Vatenus à prison perpetuelle, & luy avoit confisqué tous ses biens, pour s'estre à escient couppé le pouce de la main gauche, pour s'exempter de ce voyage. ^a Quelqu'un, dont il ne me souvient point, ayant gagné une bataille navale, fit couper les pouces à ses ennemis vaincus, pour leur oster le moyen de combatre & de tirer la rame. ^c Les Atheniens les firent

coupper aux *Æginetes*, pour leur oster la preference en l'art de marine. ¶ En Lacedemone le maistre chastioit les enfans en leur mordant le pouce.